

# Xroon kuayé'e sen Hebreo

**Ndo Dio nichja'ina ndo  
ixi Chjen'en ndo**

**1** <sup>1</sup>Ó seno ndo Dio nanaó nichje'e ndo sen tachrí'ina xranchrjen ixi sen kuanichjaxin chijnie ndo Dio ko itsjé nge'e juako ndo. <sup>2</sup>Ko nchakon tsaxi tsjexixin kain nge'e ndo Dio nichjaxin ndo Chjen'en ndo, xjan Jesucristo. Ndo Dio chjée ndo Jesucristo juachaxin juinchekonchjian ndo kain nge'e jii xasintajni ko ngajní, ko je'e ndo Jesucristo kuayé'e ndo juachaxin ixi tsetuan'an ndo kain nge'e. <sup>3</sup>Ko ndo Jesucristo xraje'o chjiixro chónnda ndo xranchi chjiixro chónnda ndo Dio, ko je'e ndo naxraje'o ndo xranchi ndotée ndo ko ixi juachaxin chonda ndo me'e jichón kain nge'e. Ko ixi ndo Jesucristo kuen'en ndo, méxin juinchemé'e ndo kain jfeina, ko tjume'e bake'e ndo ndatsjonxin jian ti jitetuan'an Ndotée ndo.

**Chjen'en ndo Dio ícha  
tetuan'an ixi sen ángel**

<sup>4</sup>Chjen'en ndo Dio, kuayé'e juachaxin ixi ícha tsetuan'an ndo ixi sen ángel ixi je'e ndo

tikinixin'en ndo xrochónnda ndo ícha juachaxin. <sup>5</sup>Méxin, ndo Dio ndache'a ndo ninaa sen ángel:

Ja'a Chjan'na,  
ko jan'an ndachrjan ixi jan'an  
Ndotáa.

Ko kaxon ndachro ndo:

Jan'an xrokjanna Ndotáa,  
ko ja'a chjan'na.

<sup>6</sup>Ko nchakon xruan'an ndo Dio chjen'en ndo, xjan naakuaxon, ngata'a nunte xasintajni, ndachro ndo Dio:

Kain sen ángel na'na  
tsajon sen juasaya ngajin  
chjan'na.

<sup>7</sup>Ko ndachro ndo Dio ixi sen ángel:

Sen ángel juntáña jan'an  
xranchi chrinto, je'e sen,  
ko sen nche'e xrana xranchi  
xro'i tjama, me'e je'e sen.

<sup>8</sup>Ko ndo Dio ndache ndo Chjen'en ndo:

Ja'a ndo Dio tsetuan'an kain  
nchakon  
ko ja'a jian tsetuan'an.

<sup>9</sup>Ja'a tjue'e kain ti jian,  
ko ningakon'en ti ndako'a jii.  
Méxin, ndo Dio kuincha'a  
ndo ja'a, ndo Dio na'a.  
Ícha ijié juaxruxin tjáa ndo  
ixi ikaxin sen kuajiku'a.

- <sup>10</sup>Kaxon ndachro ndo:  
 Ja'a Ncháina,  
 juinchekonchjian  
 nunte xasintajni<sup>a</sup> ti  
 xraxrangíxixión konchjian  
 kain nge'e,  
 ko kaxon juinchekonchjian  
 ngajní,  
 kain me'e tjáa juincheñaxian.
- <sup>11</sup>Kain ji'in tsjexin ko tsontaxi  
 xranchi manta tetsáani,  
 je'o ja'a tsarichuan kain  
 nchakon.
- <sup>12</sup>Kain ji'in xranchi naa manta  
 tetsáani ó tjoké'e ko ndá'a  
 tjankani,  
 xranchi chujni tindoxin'en  
 manta jiá,  
 kain me'e tsjexin.  
 Je'o ja'a kain nchakon  
 tsarichuan  
 ixi ja'a tsjexin'a.

<sup>13</sup>Ndo Dio ndache'a ndo ninaa  
 sen ángel ja'in:  
 Take'é ndatsjonxin jian ti  
 ritjén jan'an, tsakeja jan'an  
 ni ningakon'an ngangí  
 tutáa.

<sup>14</sup>Kain sen ángel me'e espíritu  
 tikon'ani nche'e ixra ngajin ndo  
 Dio ixi je'e sen kuituen'en sen  
 tsingijna sen chujni tsitjáña'i  
 aséen ko tsechón kain nchakon.

**Nchetjáña'inta juachaxin  
 kuaye'enta**

**2** <sup>1</sup>Méxin, xrokonda  
 tsienxinna ícha jian chijni  
 kuaye'ena ixi jaña tsintue'ana

cha'o jian. <sup>2</sup>Chijnie ndo Dio  
 tsichronga sen ángel ó sa'ó me'e  
 chijni nduaxin. Ko sen kuin'en  
 chijni ko kuitikaon'a sen, kuama  
 sen ijie, ko tangi kon'en sen ixi  
 jaña bikinixin'en sen. <sup>3</sup>Méxin,  
 ¿xranchi satsinge'ena nchakon  
 sinchéña ndo Dio ijie, siá je'e  
 ndo ó juinchemé'e ndo jjeina ko  
 kuajon ndo juachaxin tsen'ana  
 ko jaña tsintu'ena me'e? Chijni  
 ó sa'ó tsichronga Ncháina<sup>b</sup>  
 Jesucristo, ko sen kuin'en chijni  
 chronga sen ixi chijni me'e  
 nduaxin chijni, ko tjume'e jaña  
 kuaye'ena chijni. <sup>4</sup>Ko ndo Dio  
 juako ndo ixi nduaxin chijni  
 me'e ko juinche'e ndo itsjé ixra  
 ijie ko chjaña ndo juachaxin  
 tajon Espíritue ndo ko kain ji'i  
 kon'en xranchi je'e ndo tjaun  
 ndo.

**Ndo Jesucristo tajon ndo  
 juachaxin tsechón chujni**

<sup>5</sup>Ndo Dio chjé'a ndo sen ángel  
 juachaxin ixi je'e sen tsetuan'an  
 sen nunte natjúá, nandá tsij, ti  
 stetjoina jai. <sup>6</sup>Xroon chijnie ndo  
 Dio ndachro xroon:

¿Nge'e tjintee chujni, ixi  
 ja'anta Ndotáina Dio tsango  
 xraxaonnta ixi je'e chujni?  
 Ko, ¿nge'e tjintee chujni  
 ixi ja'anta tsango taxinta  
 chujni juachjaon?

<sup>7</sup>Ko ja'anta juinche'enta kaxin  
 nchakon ixi ícha tjinte'a  
 chujni ixi sen ángel,

<sup>a</sup> 1:10 xasintajni mundo <sup>b</sup> 2:3 Ncháina Señor Ncháina Jesús o Ncháina Dio

ko tjume'e kuajonnta ijié  
juachaxin ngajin chujni  
ko tsetuan'an nã ngajin kain  
nge'e juincheñanta.

<sup>8</sup> Kain nge'e juincheñanta  
bakéenta ngangí tutée  
chujni ixi tsetuen'en kain  
nge'e.

Méxin, chónnda ndo juachaxin  
tsituan'an ndo ko jai xratikon'ani  
me'e. <sup>9</sup> Ko noina ixi ndo Jesús,  
ndo ikjan ícha tjinte'a ixi sen  
ángel kaxin nchakon, ko ndo Dio  
ixi tjaunna ndo xruan'an ndo ndo  
Jesucristo kuen'en ndo kondeexin  
kain ijié kuachonda jaina ko jai  
je'e ndo ijié juachaxin chónnda  
ndo ko kain chujni tsajon nã  
juasaya<sup>c</sup> ngajin ndo ixi ti tsango  
tangi kon'en ndo.

<sup>10</sup> Ko kain tikinixin'en ndo  
Dio ko kain nge'e jii je'e ndo  
juinchéña ndo, ko je'e ndo  
tjaun ndo ixi kain chjen'en ndo  
xrochónnda xjan juachaxin tsintee  
xjan ti tetuan'an ndo. Méxin,  
ndo Dio kuajon ndo juachaxin  
ixi kuen'en ndo Jesús, ixi jaña  
kuayé'e ndo ícha ijié juachaxin,  
ko jaña kuantsjengí'e ndo ijié  
sínká kain chujni. <sup>11</sup> Ko ndo Jesús  
tsango tjúá ndo, ko je'e ndo  
nchetjúá ndo aséen sen titikaon  
ndo, sen me'e ko je'e ndo, xraje'o  
ndo Dio, Ndotée sen. Méxin, ndo  
Jesús tosue'a ndo ndachro ndo  
ixi sen titikaon ndo, sen kichuu  
ndo sen me'e. <sup>12</sup> Ko je'e ndo  
ndache ndo ndo Dio:

Sintano'a sen kichian ixi  
ja'anta;  
ko kaxon jan'an xrotsje,  
tsajon juasiana ngajinnta  
ngusine ti ste sen kichian.

<sup>13</sup> Kaxon ndachro ndo Jesús:  
Jan'an chuntia ngajin ndo  
Dio.

Ko íjngo ndachro ndo:

Nti'i ritjén ngajin chjen'en  
ndo Dio, xjan chjána ndo.

<sup>14</sup> Kain chujni ste ngata'a nunte  
xasintajni chónnda nã ntao ko ijni;  
jaña ndo Jesús nchakon jongí'e  
ndo kaxon kuachónnda ndo ntao  
ko ijni xranchi chujni, me'e chao  
kuen'en ndo ixi juinchejexin  
ndo juachaxin kuachónnda  
Xixron'anxrée, xi tituen'en ti  
ten'en chujni. <sup>15</sup> Ko ndo Jesús  
kuen'en ndo me'e kuantsjengí'e  
ndo ti kuaxrakon'en chujni ti  
tsen'en nã ixi baxronka nã kain  
nchakon ixi bakintee nã xranchi  
naa ni stechrua aséen. <sup>16</sup> Ndo  
Jesús kui'a ndo ixi tsingijna  
ndo sen ángel. Je'e ndo kuij  
ndo ixi tsingijna ndo chujni  
kuachrjenixin ndo Abraham.  
<sup>17</sup> Méxin, je'e ndo Jesús jongí'e  
ndo xranchi naa chujni,  
kuitikaon ndo kain nge'e ixi jaña  
tsingijna ndo sen kichuu ndo, ko  
jaña ikjan ndo naa taana ícha  
tetuan'an ngajinxin<sup>d</sup> ndo Dio,  
jaña juacha ndo juenga ndo 'nã  
ti sínká kain chujni ixi kuen'en  
ndo. <sup>18</sup> Xranchi ndo Jesús tangi  
kon'en ndo ko Xixron'anxrée

<sup>c</sup> 2:9 juasaya respeto, honor <sup>d</sup> 2:17 ngajinxin delante de

tjaun xa xrojuincheye'e xa ndo  
ixi xrojuinche'e ndo xrojan  
nge'e ndako'a, méxin jai  
nchakon Xixron'anxrée tjaun  
xa ixi sincheyaina xa jaina  
ixi sinche'ena ti ndako'a, ndo  
Jesús chao tsingijnana ndo ixi  
sinche'ana me'e.

**Ndo Jesús ícha tetuan'an  
ndo ixi ndo Moisés**

**3** <sup>1</sup>Méxin, kichuuna, ja'anta  
ti kontjúá asáanta,  
ja'anta ti kuiya'anta ndo Dio  
ixi xrokjannta chujnie ndo ko  
jian tsje'enta ndo Jesús ixi je'e  
ndo kóna ndo Ndotánaina ícha  
tetuan'an; juasiexin je'e ndo,  
chuntiana ngajin ndo Dio. <sup>2</sup>Ndo  
Jesús tsango kuitikaon ndo ndo  
Dio, méxin, ndo Dio chjée ndo  
ndo Jesús naa ixra tsango tjintee,  
xranchi kaxon ndo Moisés jian  
kuitikaon ndo ti ixra juinche'e  
ndo ndo'a ndo Dio. <sup>3</sup>Ko ndo  
Jesús ícha ijíe juachaxin kuayé'e  
ndo ixi ndo Moisés, xranchi  
naa sen juinçekonchjian naa  
nchia, ícha tjintee je'e sen ixi je'e  
nchia. <sup>4</sup>Ngujngu nchia xrojan  
chujni juinçekonchjian nchia,  
ko je'e ndo Dio ixi juachaxien  
ndo konchjian kain nge'e jii.  
<sup>5</sup>Je'e ndo Moisés tsango jian  
kuitikaon ndo ko jian ixra  
juinche'e ndo ngajin ndo Dio. Ko  
ti ixra juinche'e ndo Moisés me'e  
chronga nge'e xrojuinche'e ndo  
Dio ikaxin nano tjume'e. <sup>6</sup>Ko ndo  
Cristo, Chjen'en ndo Dio, tsango  
tayakon'en ndo ndo'a ndo Dio

ko nchia me'e jaina, siá nduaxin  
tsitikaonna ndo, xroché'e aséejina  
ko xrochuntiana ixi tsayé'ena ti  
nge'e tsajon ndo tsijija nchakon  
tsjexin kain nge'e.

**Ti jii ndo Dio, nti'a  
tsjoké'e tjajné'e ndo**

<sup>7</sup>Méxin, ndachro Espíritue ndo  
Dio jitaxin xroon:

Siá jai tsin'ennta nge'e  
ndachro ndo Dio,

<sup>8</sup>nchecha'i asáanta xranchi  
juinche'e sen tachrí'anta ó  
sa'ó,

sen juincheño ndo Dio ti  
ntajie nchese.

<sup>9</sup>Ti ndachro sen tachrí'anta  
xranchrjen:

“Tsikonna á nduaxin ndo Dio  
chóna ndo ijíe juachaxin  
o na'í”,

ko kuitikaon'a sen ixi je'e ndo  
naa ndo Dio nduaxin,  
maski yuukan nano bikon  
sen ijíe nge'e juinche'e ndo.

<sup>10</sup>Méxin, jan'an ndo Dio koña'ó  
ngajin kain sen kuintee  
nchakon me'e,

ko ndachrjan:

“Ja'anta tsango  
juinchengachroe asáanta,  
ko kuitikaon'anta chijnina  
kuetuan'annta.”

<sup>11</sup>Méxin, nchakon koña'ó  
ngajin sen, xraxa'on:

“Tsájon'a juachaxin tsatsinga  
sen ti jintakonchjian naa  
tjajna tsjoké'e sen.”

<sup>12</sup>Kichuuna, tsje'enta jian, ixi  
ninaa ja'anta xrochonda'intá naa

asáanta ña'i, ko tsachrendáanta ko tsitikaon'anta nge'e tetuan'an ndo Dio, ndo jichón. <sup>13</sup>Na'i, cháña nichje'é kichuunta ngujngu nchakon, jai ti xrajíi juachaxin tsarichonnta, jaña sintaya'inta Xixron'anxrée ixi sinchecha asáanta ko xronichjangí'enta ndo Dio.

<sup>14</sup>Ko siá soji xrochuntiana kain nchakon xranchi ti xrangíxixión kuaxi kuitikaonna chijnie ndo, me'e tsikinixina tsojuna ngajin ndo Cristo.

<sup>15</sup>Ja'in jindachro chijnie ndo Dio:

Siá jai tsin'ennta ti ndachro ndo Dio,  
nchecha'i asáanta xranchi  
juinche'e sen tachrí'anta  
nchakon juincheña sen ndo  
Dio ixi nichjangí'e sen ndo.

<sup>16</sup>Sen me'e ó kuin'en sen téé ndo Dio ko xrajaña nichjangí sen, kain sen kuantsjexin ndo Moisés nunte Egipto. <sup>17</sup>Méxin, koña ndo Dio ngajin sen, yuukan nano, sen me'e kuama sen ijie, méxin, kuinteken'en sen ti ntajie nchese. <sup>18</sup>Ndo Dio ndache ndo sen me'e: "Ja'anta tikinixian'inta tsixin'innta ti tjajna juintakonchjian ti tsjoké'eni." Sen ndache ndo me'e, sen nichjangí ko kuitikaon'a sen ndo. <sup>19</sup>Ko nojña nduaxin kuixin'a sen ti tjajna tsjoké'eni ixi kuitikaon'a sen ndo Dio, ndo nduaxin.

**4** <sup>1</sup>Méxin, siá ndo Dio xrajitajon ndo juachaxin tsatsingana ti tsjoké'eni ti

tetuan'an je'e ndo, xrokonda jian xrotsje'ena xranchi tsojuna ixi ba xrojan jaña tsixin'ana ti juinchekonchjian ndo Dio tsjoké'eni. <sup>2</sup>Kao jaña kuin'enna chijnie ndo, chijni jian xranchi kuin'en sen tachrí'ina, ko je'e sen maski kuin'en sen chijni jian, xro'an konde'e sen chijni ixi chúntia'i sen. <sup>3</sup>Ko jaña ti kuitikaonna chijnie ndo, me'e tsixin'inna tsjokeña nti'a. Ixi ja'in tsindachro ndo Dio:

Ixi juincheñaona sen,  
méxin, ndachrjan tsixin'a sen  
tsjoké'e sen ti ritjén jan'an.

Jaña ndachro ndo ixi maski ó no'e ndo ixi jaña xrojuinche'e sen ti nchakon xrangíxixión kóña kain nge'e ko nunte xasintajni.

<sup>4</sup>Ja'in nichja xroon chijnie ndo Dio ti joke'e ndo nchakon yatō:

Juexin juinche'e ndo Dio kain  
xrée ndo,  
tjume'e joke'e ndo ti nchakon  
yatō.

<sup>5</sup>Ko fjngo ndachro xroon chijnie ndo Dio:

Tsajon'a juachaxin tixin'in sen  
tsjoké'e sen ti ritjén jan'an.

<sup>6</sup>Ko xratitjáña tsayé'e ikaxin chujni juachaxin tsatsinga sen tsjoké'e sen nti'a. Ixi sen sa'ó kuin'en chijni jian, kuayé'a sen juachaxin kuatsinga sen ti tsjoké'eni ixi kuitikaon'a sen chijnie ndo. <sup>7</sup>Méxin, ndo Dio fjngo kuajon ndo inaa nchakon, me'e jai, ko chijnie ndo ja'in ndachro ti tsikjin ndo David ícha tjume'e ti ó kuin'enna ícha seno:

Siá jai tsin'ennta chijni  
tsinichja ndo Dio  
nchecha'i asáanta.

<sup>8</sup>Siá ndo Josué xrokuajon ndo ti xrojuke'e sen israelita, sen tjajnéé ndo Dio, íxrondachro'a ndo Dio ixi xrokuajon ndo inaa nchakon xrochonda sen juachaxin tsitikaon sen. <sup>9</sup>Ko jai xra jii inaa juachaxin tixin'in sen titikaon ndo Dio tsjoké'e sen ti no jii je'e ndo; <sup>10</sup>ixi sen tsayé'e juachaxin tixin'in sen tsjoké'e sen ti jii ndo Dio, sen me'e ó tsjoké'e sen ti ixra kuanche'e sen, xranchi ndo Dio joke'e ndo ti ixra juinche'e ndo. <sup>11</sup>Méxin xrokonda jaína soji tsitikaonna ndo Dio ko jaña tsayé'ena juachaxin tsixin'inna tsjokeina ti jii ndo, ko sinche'ana xranchi juinche'e sen tachrí'ina, ti kuitikaon'a sen ndo.

<sup>12</sup>Ixi chijnie ndo Dio, jichón chijni ko chóna chijni ijié juachaxin ko ícha yao chijni ixi chika espada yaxin yuxin lado, ko tito'o chijni ícha ngaxin'in aséeina ko espírituina. Ko jian nchexraxaonni chijni ko nduaxin no'e chijni kain ti nge'e tjaun sinche'e aséeina. <sup>13</sup>Xro'an nge'e ti juinchéña ndo Dio tsjacha tsemá ngajin ndo, ixi je'e ndo chúxin ndo kain nge'e, ko kain nge'e ti ndako'a nche'e nā maski xroxraabaatja, je'e ndo chao tikon ndo, ko ngajin ndo xrokonda xrondachrona kain nge'e sinkana.

**Ndo Jesús me'e ndotaana  
tsango tituan'an**

<sup>14</sup>Ndo Jesús, Chjen'en ndo Dio, me'e ndotánaina ícha tetuan'an; je'e ndo kuixin'in ndo ngajni ti jii ndo Dio. Méxin, jaína xrokonda soji tsojuna ko tsintue'ana nge'e ti kuin'enna ko kuitikaonna.

<sup>15</sup>Ko ndotánaina, ndo ícha tetuan'an, chao tsikonó'ina ndo nchakon Xixron'anxrée tjaun xa sincheyaina xa xranchi tjaun xa xrojuincheye'e xa ndo Jesús ko je'e ndo juacha ndo ko xro'an ijie kuama ndo. <sup>16</sup>Méxin, chao tsonchjiñe'ena ti tetuan'an ndo Dio ixi je'e ndo tsango tjuajina ndo, ko tsikonó'ina ndo ko tsingijnana ndo nchakon xrokondajna xrojan nge'e.

**5** <sup>1</sup>Chujni bakayé'e ixra ndotaana ícha tsituan'an, ndo Dio tinche'e ndo sen ngakjen'en sen xi, ixi xronichjaxin ndo ixi je'e sen ngajin ndo Dio. Ixi je'e ndotaana tsikao ndo ti tajon tjajnéé ndo tsayé'e ndo Dio, kaxon je'e ndotaana tsikao ndo iko, ko iko me'e tsen'en ba ixi jaña tsomé'e ijie chóna chujni. <sup>2</sup>Ko ndotaana me'e kaxon no'e ndo ixi tangi tsitikaonni ndo Dio, méxin je'e ndo chao tsikono'e ndo chujni noe'a ko ndako'a nche'e. <sup>3</sup>Je'e ndotaana kaxon chóna ndo ijie, méxin, xrokonda tsóna ndo iko tsajon ndo ixi jaña tsomé'e jíee ndo, ko tsóna ndo iko ixi tsoMéxin jíee chujni.

<sup>4</sup>Ko xro'an ngisen je'o sen xrondachro sen ixi je'e sen ndotaana ícha tetuan'an. Na'i, ndo Dio xrokonda tsinche'e ndo sen ko je'e ndo tajon ndo juachaxin ngajin sen, jaña juinche'e ndo nchakon kuinche'e ndo ndo Aarón. <sup>5</sup>Jaña ndo Cristo, je'a je'o ndo ndachro ndo ixi je'e ndo ndotaana ícha tetuan'an. Na'i. Ndo Dio kuajon ndo juachaxin me'e, méxin, tsindachro ndo:

Ja'a chjan'na;  
ko xrondachrjan jan'an jai  
jan'an ndotáa.

<sup>6</sup>Kaxon ja'in jitaxin xroon chijnie ndo Dio:

Ja'a naa ndotaana tsake'e  
kainxin nchakon,  
xranchi bake'e ndo  
Melquisedec.

<sup>7</sup>\*Nchakon bake'e ndo Cristo ngata'a nunte xasintajni tsango soji kuinóatée ndo ko kuintjé ndakon ndo ngajin ndo Dio, ndo chóna ijié juachaxin tsingijna ndo ndo Cristo ixi tsen'a ndo. Je'e ndo Cristo tsango kuitikaon ndo, méxin kuin'en ndo Dio ti juanchia ndo. <sup>8</sup>Maski ndo Cristo, Chjen'en ndo Dio, chinga juinchekao na ndo, je'e ndo kuitikaon ndo ndotée ndo. <sup>9</sup>Je'e ndo tsango tjúá aséen ndo ko kuitikaon ndo kain nge'e kuituen'en ndo; méxin, je'e ndo chóna ndo ijié juachaxin ko tsajon ndo juachaxin me'e ngajin

sen titikaon ndo ko tsechón sen kain nchakon. <sup>10</sup>Méxin, ndachro ndo Dio je'e ndo Jesús ndotaana ícha tetuan'an xranchi bake'e ndo Melquisedec.

### Tintue'anta chijnie ndo Dio

<sup>11</sup>Jan'anna chondana itsjé nge'e sintakuan'annanta ixi chijni ji'i, ko tsango tangi xrontatjunanta ixi ja'anta tsango indao tienxinnta. <sup>12</sup>\*Ja'anta ó chao xrojuinchekuen'ennta ikaxin sen ixi ja'anta ó sée no'anta chijni ji'i. Ko jai xrokonda íjngo tsaxi tsokuan'annta chijnie ndo Dio. Ja'anta stenta xranchi naa xjan nchíín ne'a xjan ti ine sen cha, xrokonda tsi'i xjan itsjin. <sup>13</sup>Ko sen ti'i itsjin, sen me'e ste sen xranchi naa xjan nandá tsijongí'e, tienxin'a sen chijnie ndo Dio, méxin, jua'i nche'e sen ti jian. <sup>14</sup>Ko sen tienxin ko no'e nge'e ti jian ko ti ndako'a, sen me'e ó ine sen nge'e ine ti sen ícha.

**6** <sup>1</sup>Xrokonda ícha tsonojina chijnie ndo Dio ixi jaña ícha jian sintu'una ko soji tsitikaonna Ncháina. Ko je'a je'o sinchekuanxinna ti juinchekuaina sen nchakon nandá kuaye'ena chijnie ndo Cristo ko íxrokjan'ina xroxraxaonna je'o xranchi tsintu'ena ti ndako'a juintu'una sa'ó ko sinchekuen'a kichuuna íjngo xranchi xrochuntiana ndo

Dio, <sup>2</sup>ko kaxon ti juinchekuajna sen xranchi tsikitéeni, kaxon xranchi tsake'e itjani ngata'a jaa sen titikaon ndo Dio, xranchi xroxechón sen tsiken'en, ko xranchi tsij nchakon ndo Dio sinchéña ndo ijie ngata'a kain chujni. <sup>3</sup>Ko chao tjume'e ícha tsjakona chijnie ndo Dio síá je'e ndo tsajon ndo juachaxin.

<sup>4</sup>Ixi sen ó kuayé'e xro'i tingasáña ko juinche'e sen juaxruxin nge'e kuitun'en sen ti kuajon ndo Dio, ko sen me'e kaxon tsikayé'e sen Espíritue ndo, <sup>5</sup>sen ó juinche'e juaxruxin tin'en chijnie ndo Dio, ko no'e sen ixi ijie juachaxin tsake'e nchakon tsij nunte natjúá <sup>6</sup>ko síá sen me'e ikjan sen sinche'e sen ti ndako'a, sen me'e í jua'i sinche'eni ixi xrokjan tsitikaon sen ndo Dio ixi xranchi je'e sen íjngo xrokuasintjian sen chjen'en ndo Dio, ndo Jesús, nganito ntaá ko íjngo tsjanao sen ndo. <sup>7</sup>Ko sen kuayé'e chijnie ndo, sen me'e ste sen xranchi inche ti'i inda nchakon soji tij ichrin ko chaxro tangi ino ko ika ti tenga chujni ko kueya tsee xejo ixi juinchenchaon ndo Dio nunte me'e. <sup>8</sup>Ko síá nunte me'e je'o chá'a tsangi, ti binga nti'a xro'an tjintee, ko chá'a me'e tsayé'e cha juañaue ndo Dio, ko je'o jichón'en cha xroche cha.

#### Soji titikaonna ndo Dio

<sup>9</sup>Maski ja'in soji stenichjana, ja'anta kichuuna, nónana ixi

ja'anta tikinixinnta ndo Dio ixi kuantsjengí'e ndo ijie kuachóna asáanta. <sup>10</sup>Ixi ndo Dio tsango jian ndo, me'e xrotjáñe'a ndo ti jian stenche'enta ko ti tingijnanta sen kichuunta, sen tjúá aséen, jaña tjakoxinnta ixi nduaxin tjue'enta ndo Dio. <sup>11</sup>Ko tja'onna ixi ngujngu ja'anta tsjáxoxinnta ixi juaxruxin nche'enta kain me'e, jaña tsjakonta ixi stechon'ennta nge'e ndachro ndo Dio tsajon ndo. <sup>12</sup>Ko tjaun'ana tsaxi tsosa'anta. Jan'anna tja'onna sinche'enta xranchi sen nduaxin chuntia ndo Dio, ko sen me'e stetayé'e sen nge'e tsindachro ndo Dio tsitun'en sen.

#### Ti ndachro ndo Dio tsitun'en sen

<sup>13</sup>Nchakon ndo Dio tsindache ndo ndo Abraham ixi tsajon ndo naa nge'e tsitun'en ndo Abraham méxin je'o je'e ndo Dio tsinichjaxin aséen ndo ixi xro'an ngisen ícha ijie ixi je'e ndo, ko ndachro ndo nduaxin tsajon ndo nge'e ndachro ndo. <sup>14</sup>Ko ja'in tsindachro ndo Dio: “Nduaxin jan'an sintanchaoan, ko kueya ichjan tsachrjenixian ja'a.” <sup>15</sup>Ko ndo Abraham nduaxin chón'en ndo, me'e kuayé'e ndo ti tsindachro ndo Dio tsitun'en ndo. <sup>16</sup>Nchakon naa ngisen nichjaxin inaa ngisen ixi nduaxin sinche'e sen ti ndachro sen, xrokonda sen me'e ícha ijie sen o ícha tituan'an sen ixi jaña sincheye'a kichuu sen ko í tsjakaxin'a sen.



<sup>17</sup>Ndo Dio tjaun ndo juako'e ndo chujni ixi je'e ndo nduaxin tsajon ndo ti ndachro ndo, méxin, je'o je'e ndo nichjaxin aséen ndo, ko ti ndachro ndo xro'an nge'e tsindoxin ixi je'e ndo noe'a ndo ncheya ndo.

<sup>18</sup>Jii yuu nge'e tsinichja ndo Dio me'e jua'i tsindoxin: ti je'o je'e ndo nichjaxin aséen ndo ko ti tsindachro ndo tsitun'en sen titikaon ndo, ko ndo Dio jua'i sincheya ndo; ko me'e ícha sinchesojina ixi xrochuntiana ixi je'e ndo xrochjajna ndo ti tsindachro ndo.

<sup>19</sup>Ko ti stehuntiana ndo, me'e sinchesoji aséeina xranchi chika stehruaxin ntábarco, ko xranchi chika me'e jaña jaina chondana nge'e stehruaxinna tsatsingatu'e tuenxin velo jii ni'ngo ti jii ngajní, ko me'e nchenojina ixi tsayé'ena ti tsajon ndo Dio.

<sup>20</sup>Nti'a kuixin'in ndo Jesús, me'e kuantje'e ndo cha'o tsixin'in jaina, me'e je'e ndo ikjan ndo naa ndotaana ícha tetuan'an, ko je'e ndo ndotaana tsake'e ndo kainxin nchakon xranchi bake'e ndo Melquisedec.

**Ndo Jesús naa ndotaana xranchi ndo Melquisedec**

**7** <sup>1</sup>Ndo Melquisedec naa rey kuetuan'an tjajna Salem ko ndotaana ne'e ndo Dio jii ngajní, kuachrje ndo kuayé'e ndo ndo Abraham nchakon kjanxin ndo Abraham ti kuətoka'o ndo ikaxin xi rey

ko juacha ndo, ko ndotaana Melquisedec juinchenchaon ndo ndo Abraham. <sup>2</sup>Jaña kaxon ndo Abraham kuajon ndo ngajin ndo Melquisedec itexin ti kainxin nge'e tsijacha ndo ti ikjui ndo kue'to ndo ko juacha ndo ngajin ikaxin xi rey. Ko nombrée ndo Melquisedec xrondachro “naa rey tsango jian nchéña ijie”; ko ti rey ne'e tjajna Salem, me'e xrondachro “naa rey tjaun'a tsetoni.” <sup>3</sup>Noe'ani ngisen ikjui ndotée ndo Melquisedec ko ngisen ikjui janée ndo ko ngisen ikjui sen tachrí'e ndo; ko noe'ani ngixe'e nchakon tsijongí'e ndo ko noe'ani nchakon tsiken'en ndo. Méxin, je'e ndo xraje'o ndo xranchi Chjen'en ndo Dio, ko je'e ndo naa ndotaana tsake'e kainxin nchakon.

<sup>4</sup>Jian tsje'enta ixi ndo Melquisedec ícha baketuan'an ndo, méxin, ndo Abraham, ndo tachrí'ina xranchrjen, tsichjée ndo ndo Melquisedec ti texin ti kain nge'e tsijacha ndo nchakon tsike'to ndo ngajin ikaxin xi rey ko chujnie xa. <sup>5</sup>Ko ley tsikjin ndo Moisés ixi sen taana, sen tsikachrjenixin ndo taana Leví, je'e sen tikinixin'en sen tsayé'e sen ti texin ti kain nge'e chóna chujni, maski kichuu sen, ixi kain sen tsikachrjenixin sen ndo Abraham. <sup>6</sup>Ko ndo Melquisedec, maski kuachrjenixin'a ndo ndotaana Leví, kuayé'e ndo ti texin nge'e kuajon ndo Abraham, ko juinchenchaon ndo ndo

Abraham, ndo kuitun'en nge'e ti tsindachro ndo Dio. <sup>7</sup>Ko kainna noina ixi naa sen ícha ijíe ko ícha tetuan'an, me'e sen tikinixin'en sinchenchaon<sup>e</sup> inaa sen. <sup>8</sup>Kain sen taana tayé'e ti itexin nge'e tajon chujni, sen taana me'e chujni jii ngata'a nunte ko xranchi kain chujni, ten'en sen kaxon. Ko xroon chijnie ndo Dio nichja xroon ixi ndo Melquisedec xrajíi ndo xranchi naa sen jichón. <sup>9</sup>Ko chao xrondachroni ixi ndo Leví ko kain sen taana tachrjenixin ndo, sen stetayé'e ti texin nge'e tikinixin'en sen, kaxon je'e sen ó juenga sen 'na ngajin ndo Melquisedec nchakon juenga ndo Abraham 'na ti texin nge'e ngajin ndo Melquisedec ixi je'e sen Leví kuachrjenixin sen ndo Abraham. <sup>10</sup>Ko chao xrondachrona ixi Ndotáina Abraham ó jitika'o ndo sen tsachrjenixin ndo ngaxin'in aséen ndo, nchakon kuachrje ndo Melquisedec ko kuetan kichuu sen ko juinchenchaon ndo Melquisedec ndo Abraham.

**Ndo Jesús xranchi ndo  
Melquisedec ndo**

<sup>11</sup>Chujni tjajna Israel kuayé'e ley juako sen taana levita, sen kuachrjenixin ndo Aarón, ko siá nduaxin ley me'e xrokontjuáxin aséen sen, íxrokonda'i xrokonoxin inaa ndotaana; ndotaana me'e kuachrjenixin'a ndo ndo Aarón, je'e ndo xrobake'e ndo xranchi

ndo Melquisedec. <sup>12</sup>Ixi xranchi kujíi inaa ndotaana ícha ijíe, jaña xrokonda tsindoxin ley kaxon. <sup>13</sup>Ko ti nichja xroon chijnie ndo Dio ixi Ncháina, je'e ndo kuachrjenixin ndo inaa tjajna tikinixin'en tjajna Israel, ko tjajna me'e ninaa sen juinche'a sen xra nche'e ndotaana. <sup>14</sup>Ko jaina jian noina ixi Ncháina tsikachrjexin ndo tjajna Judá, ko ndo Moisés tsichronga'i ndo ixi tjajna me'e xrokuachrjenixin naa ndotaana.

<sup>15</sup>Ko ícha jian tienxinna ixi ndotaana natjúá tsijí me'e naa ndotaana tonoxin xranchi ndo Melquisedec. <sup>16</sup>Ko je'e ndo je'a ikjan ndo naa taana xranchi nichja ley ixi xrokonda tsinche'e sen ngisen tsíxin naa sen tsikachrjenixin naa sen tsango jian. Ko je'e ndo Jesús naa ndotaana ícha tetuan'an ixi nai'a tsitjáña ndo. <sup>17</sup>Ko ja'in nichja ndo Dio ixi Ncháina:

Ja'a naa ndotaana tsake'e  
kain nchakon,  
ko xrochonda juachaxin  
xranchi ndo Melquisedec.

<sup>18</sup>Méxin, ti baketuan'an ley sa'ó, jai ó komé'e ley me'e, ixi ítunda'i ko íxro'an xrée ley me'e.

<sup>19</sup>Ti ley kuajon ndo Moisés jua'i kuindoxin ti ndako'a kuanche'e chujni. Ko jai kuaxi inaa ley ícha jian, ko ley me'e ícha tsingijnana tsonchjiñe'ena ngajin ndo Dio.

<sup>20</sup>Ko ndo Dio je'o ndo nichjaxin aséen ndo ixi ndo Jesucristo

<sup>e</sup>7:7 *sinchenchaon* bendecir

nduaxin naa ndotaana chónḁa ijíe juachaxin <sup>21</sup>ixi kaxin sen kuayé'e sen xrée taana ko ndo Dio nichjaxin'a ndo sen taana. Ko ndotaana ji'i, ndo Cristo, ndo Dio nichjaxin ndo ixi aséen ndo ixi je'e ndo Cristo xrokjui naa ndotaana, xranchi jitaxin xroon chijnie ndo Dio:

Ncháina Dio je'e ndo nichjaxin ndo aséen ndo ko ti nichja ndo me'e tsindoxin'a:  
Ja'a naa ndotaana tsake'e kainxin nchakon,  
ko xrochonda juachaxin xranchi ndo Melquisedec.

<sup>22</sup>Méxin, ndo Jesús je'e ndo ndachro ndo ixi juachaxin jii jai ícha tjintee ixi juachaxin bake'e sa'ó. <sup>23</sup>Bake'e kueya sen juinche'e sen ixra taana ko bakinteken'en sen, méxin í jua'i juinche'e sen ixra me'e. <sup>24</sup>Ndo Jesús ti kuayé'e ndo ixra me'e ne'e taana ícha tetuan'an, í jua'i inaa na tsayé'e na ixra me'e ixi je'e ndo tsehón ndo kain nchakon. <sup>25</sup>Je'e ndo chónḁa ndo ijíe juachaxin, ixi chujni tsonchjiñe'e ngajin ndo Dio, je'e ndo Jesús chao tsantsjengí'e ndo ti ndako'a nche'e sen, ixi je'e ndo tsehón ndo kain nchakon ko je'e ndo kain nchakon tinóatée ndo ngajin ndo Dio ixi chujnie ndo.

<sup>26</sup>Je'e ndo Jesús ndotaana ícha tetuan'an, me'e ndo xrokondaina ixi tsango tjúá aséen ndo ixi xro'an ijíe sínká ndo ko tonchjiñe'a ndo ngajin chujni

ndakua'i nche'e, méxin ndo Dio kuajon ndo juachaxin kuajin'in ndo Jesús ngajni ko kuayé'e ndo juachaxin ícha tsetuan'an ndo. <sup>27</sup>Je'e ndo xrokonde'a ndo tsóña ndo iko xranchi ikaxin sen taana, sen xrokonda tsóña sen iko ngujngu nchakon tsoMéxin jíee sen ko tjume'e tsóña sen iko tsoMéxin jíee chujni tjajnée sen. Ndotánaina je'e ndo je'o naa nchakon kuajon ndo jnié ndo ko kuen'en ndo ixi jaina. <sup>28</sup>Ley kuajon ndo Moisés, ley me'e chronga xranchi bajinche'e sen taana ícha tetuan'an, ko sen taana me'e naa chujni yama ijíe xranchi ngixe'i chujni. Ko tjume'e je'o ndo Dio nichjaxin ndo aséen ndo ko ndache ndo Chjen'en ndo ixi je'e xjan xrokjan xjan naa taana ícha tetuan'an ko je'e xjan xro'an ijíe chónḁa xjan ixi tsango jian xjan, ko jaña tsake'e xjan kain nchakon.

#### Ixi ndo Jesús tixin naa juachaxin natjúá

**8** <sup>1</sup>Ti ícha tjintee stenichjana ixi ndotánaina, ndo ícha tetuan'an, jii ndo ngajni, ndatsjonxin jian ti tetuan'an ndo Dio, <sup>2</sup>ko je'e ndo nche'e ndo ixra ngaxin'in ni'ngo tsijnchekonchjian ndo Dio, ni'ngo nduaxin; je'a ni'ngo juinchekonchjian chujni. <sup>3</sup>Kain ndotaana ícha tetuan'an tsikayé'e ndo ixra ixi tsajon ndo nge'e tsayé'e ndo Dio ko tsóña ndo iko tsoMéxin jíee ni tjajnée ndo.

Méxin, ndo Jesucristo kaxon xrokonda tsajon ndo xrojan nge'e. <sup>4</sup>Siá je'e ndo xrobake'e ndo ngata'a nunte xasintajni, je'e ndo xrojuinche'a ndo xrée naa ndotaana, ixi nti'i ó jii ndotaana tajon nge'e xranchi tsiketuan'an ley kuajon ndo Moisés. <sup>5</sup>Sen taana, sen ste nti'i nche'e sen xra ko stetanseya sen xranchi nge'e jiton'en ngajni. Ko noina kaxon ixi me'e kuituen'en ndo Moisés ixi xrojuinchéña ndo ni'ngo manta xranchi ndo Dio tsindachro ndo: "Jian tsje'e kain nge'e xranchi jii ni'ngo juako'a ngata'a ijna." <sup>6</sup>Ko ndotánaína, Jesús, ndo ícha tetuan'an, je'e ndo kuayé'e ndo naa ixra ícha jian me'e je'e ndo tinóatée ndo ixi jaina, ko me'e juinchéña ndo naa juachaxin natjúá ko tsajon ndo ícha jian nge'e tsayé'ena.

**Juachaxin sa'ó ítunda'i jai**

<sup>7</sup>Siá juachaxin sa'ó nduaxin xrokuindexin ti ndako'a kuanche'e chujni, íxrokonda'i xroknoxin juachaxin yuxin. <sup>8</sup>Je'e ndo Dio bikon ndo ixi juachaxin sa'ó kuitikaon'a na ko kuindexin'a ti kuanche'e na, méxin, ndachro xroon chijnie ndo Dio:

Ncháina Dio ndachro:

Tsi nchakon jan'an tsajon inaa juachaxin natjúá ngajin ni tjajna Israel ko ni tjajna Judá.

<sup>9</sup>Juachaxin ji'i je'a xranchi juachaxin sa'ó kuajon ngajin sen tachrí'anta xranchrjen,

nchakon jan'an kuantsjexin sen tjajna Egipto; ko je'e sen kuitikaon'a sen ti juachaxin kuetuan'an sen, méxin, jan'an kuintu'a sen, ichro Ncháina Dio.

<sup>10</sup>Juachaxin sintaña ngajin tjajna Israel ti tsatsingaja kaxin nano, ja'in tson'en, ichro Ncháina Dio:

Jan'an sintaxraxa'on sen ley tsitikaon sen, ko xrokjin ley me'e ngaya aséen sen.

Jan'an xrokjanna ndo Dio ne'e sen, ko je'e sen, sen tjajnána.


<sup>11</sup>Ko íxrokonda'i ixi ikaxin sen sinchekuen'en kichuu sen xranchi xrochuntia sen Ncháina, ixi nchakon me'e kain ichjan nchínchín ko kain sen ícha icha xrochuxinna sen jan'an.

<sup>12</sup>Ko jan'an sintama'a kain ti ndako'a juinche'e sen ko jan'an íxroxraxaon'a ijie kuachónnda sen.

<sup>13</sup>Ti ndachro ndo Dio ixi ti juachaxin natjúá me'e xrondachro ixi juachaxin sa'ó ó jitjexin juachaxin ko íse'a tsitjáña juachaxin me'e.

**Ni'ngo jii ngata'a nunte xasintajni**

**9** <sup>1</sup>Juachaxin sa'ó baketuan'an xranchi xronichje'eni ndo Dio ngaxin'in ni'ngo jii ngata'a nunte



*Ntaq jita'a nutja*  
(He. 9:2)

xasintajni. <sup>2</sup>Ni'ngo manta ja'in konchjian: sa'6 jii luga ndatin'in Luga Tjúá ko nti'a jii lugee chika candelero ko mesa ti no jita'a nutja tsikonchaon tixinixin'en ndo Dio. <sup>3</sup>Tuenxin velo bake'e luga yuxin, ti ndatin'in Luga Tsango Tjúá. <sup>4</sup>Nti'a bake'e naa altar tsikonchjianxon jeoxón chika oro ko ngata'a nti'a bachexin tsjoxraxé ko nti'a bake'e kaxon arca ne'e juachaxin ko nchijíi arca me'e jitsáa jeoxón chika oro. Nti'a jixin'in naa ichi jichónda nutja ndatin'in maná kuixin ngajní. Nti'a jii kaxon ntakuto'e ndo Aarón, ntaq tsixechji; ko jii ixrotabla jitaxin ley tsikajon ndo Dio ngajin chujni. <sup>5</sup>Ngata'a arca bake'e yuu sen ángel tsikónaxin chika

oro ndatin'in querubin, ko ti ste sen querubin me'e xrondachro nti'i tetuan'an ndo Dio, ko sen querubin ixí nene'e sen jítabatjaxin sen ntachja tijexin arca ti bakoméexin jíee sen. Ko jai xrokonda'i tseki'anta ícha kondee ji'i.

<sup>6</sup>Ko tsikonchjian kain ji'i, ko tjume'e sen taana nanaó tixin'in sen ni'ngo tsikonchjianxin manta, ti luga tjúá ixí tajon sen juasaya ngajin ndo Dio. <sup>7</sup>Ko ti luga yuxin, ti ícha tjúá, je'lo ndotaana ícha tetuan'an tixin'in nti'a, je'lo naa nchakon ngujngu nano; ko nchakon tixin'in ndo xrokonda tsixin'inkao ndo jnié iko, tsoméxin ti ndako'a juinche'e ndo ko tsoméxin ti ndako'a juinche'e ni tjajnée ndo.

<sup>8</sup>Me'e Espíritue ndo Dio ícha tjúá nchenoína ixi siá xrajíi luga tjúá, ko nti'a bakayéexin ndo Dio juasaya, méxin, jua'i xrokuixin'in ngixe'li ngisen ti luga ícha tjúá. <sup>9</sup>Kain ji'in je'o jitjakoxin nge'e nojna jai, ixi kain nge'e ti bakajon chujni ko ti iko ten'en chónnda'i juachaxin ixi tsindoxin ko tsontjúá aséen chujni tajon juasaya ngajin ndo. <sup>10</sup>Ixi ji'i je'o tajon juachaxin nge'e sineni ko tsi'ini o nge'e sinche'ani ixi jaña tsachrje'eni ti ndako'a. Kain ji'i bingijna tsitjaja nchakon ndo Dio kuindoxin ndo kain nge'e ko kuajon ndo naa nge'e ícha jian.

**Ndo Cristo kuajon ndo jnié ndo ko kuen'en ndo ixi chujni**

<sup>11</sup>Ko ndo Cristo ó kuuí ndo, ko jai je'e ndo ndotaana ícha tetuan'an ko je'e ndo chónnda ndo nge'e ícha jian ti nandá tsij. Ko ti ni'ngo nche'e ndo ixra, ni'ngo ícha jian ixi ni'ngo me'e je'a konchjianxin itja chujni, ni'ngo me'e tikinixin'a nunte xasintajni. <sup>12</sup>Ndo Cristo ó kuixin'in ndo ti luga ícha Tjúá, ko íkuajon'a ndo jnié kubitó o jnié kuxintachjan. Na'i. Je'e ndo kuajon ndo jnié ndo, naakuaxixion naa nchakon kuixin'in ndo nti'a, ixi me'e juenga ndo 'na ko me'e naakuaxon kuantsje ndo ijie kuachónnda chujni, me'e kuayé'e jaina tsehónna kain nchakon. <sup>f</sup> <sup>13</sup>Siá nduaxin jnié

kuxinta ko jnié kubitó ko nteso'e kuxintachjan kunchri, tsichexin ngata'a altar, nteso me'e tsikitée kain chujni tjúá'i, nteso ko jnié iko chónnda juachaxin sinchetjúá je'o cuerpoe na. <sup>14</sup>Siá me'e chónnda juachaxin, jnié ndo Cristo ícha chónnda juachaxin, ixi juachaxien Espíritue ndo Dio jichón kain nchakon, ndo Cristo kuen'en ndo ixi chujni, ko kuen'en ndo ixi jaña ndo Dio xrokuayé'e ndo ndo Cristo xranchi naa nge'e tayé'e ndo, ko je'e ndo Cristo xro'an ijie chónnda ndo. Méxin, jnié ndo ícha sinchetjúá aséeina ko kain ti ndako'a juuntu'una, me'e jai chao sinche'ena ixra ngajin ndo Dio, ndo jichón.

<sup>15</sup>Méxin, ndo Jesucristo, je'e ndo nichjaxinna ndo ixi naa juachaxin natjúá. Ixi je'e ndo Cristo kuen'en ndo ixi chujni, me'e komé'e ti ndako'a juinche'e sen ixi batitikaon'a sen ley sa'ó; ko sen tsikiye'e ndo Dio jai chao tsayé'e sen ti tsindachro ndo tsitun'en sen, naa nge'e nai'a tsjexin. <sup>16</sup>Méxin, siá jii naa xroon jitaxin ixi xrojan ngisen tsayé'e naa herencia, xroon me'e tsaxi tsitee xroon nchakon tsen'en ngisen ti tsajon herencia me'e. <sup>17</sup>Xroon xrochjeyaxin herencia, xroon me'e tjinte'a xroon siá xrajichón ngisen kuituan'an konchjian xroon; je'o nchakon tsenjan sen, me'e tsaxi tsitee

<sup>f</sup>9:12 *tsehónna kain nchakon* vida eterna

xroon. <sup>18</sup>Méxin, juachaxin xrangíxixión tsiketuan'an ndo Dio kuaxi kuitee nchakon kuaxi kuintjí jnié iko. <sup>19</sup>Ndo Moisés tsichronga ndo kain nge'e ti tsindachro ley jitaxin ixrotabla kuin'en kain ni tjajna; ko tjume'e kua ndo chjuen kutuchjon, chjon játse, ko kaxon tu'o ntaa hisopo, ko tjume'e kuataxin jnié kuxintachjan ko jnié kubito ko kuintekjaxin inda, tjume'e kuintjitée ndo xroon jitaxin ley kuituan'an ndo Dio ko kuintjitée ndo kain chujni tjajna. <sup>20</sup>Ko ndo Moisés ndachro ndo: "Ijni ji'i tsjakoxin ti juachaxin kuetuan'an ndo Dio tsitikaonnta." <sup>21</sup>Ndo Moisés bikitée ndo ijni ni'ngo ko kain nge'e ti tunda ngaxin'in ni'ngo. <sup>22</sup>Ja'in ndachro ley ixi kain nge'e xrokonda tsontjúáxin ixi ijni; ko jua'i tsoomé'e ti ndako'a juinche'e chujni siá tsintji'a jnié iko.

**Ti kuen'en ndo Cristo me'e tsooméxin ti ndako'a**

<sup>23</sup>Méxin, xrokonda tsen'en iko ixi tsontjúáxin kain nge'e ti jii nti'i ngata'a nunte xasintajni, kain ji'i tjakoxin nge'e jii ngajní; ko ti nge'e jii ngajní xrokonda naa nge'e ti ícha tjintee tsen'en ixi jnié iko jii ngata'a nunte.

**Ti kuen'en ndo Cristo me'e chao tsantsje jíee kain chujni**

<sup>24</sup>Ixi ndo Cristo kuixin'a ndo ni'ngo tsikonchjianxin itja chujni, ko me'e je'o tjako ixi

jii naa ni'ngo ngajní, nduaxin tjintee. Me'e je'e ndo kuixin'in ndo ngajní ko jai jii ndo ti jii ndo Dio ko nti'a jinichjaxin ndo ixi jaina. <sup>25</sup>Ko je'e ndo je'a kuen'en ndo itsjé vez xranchi nche'e Ndotaana judío, ndo ícha tetuan'an, ixi tixin'in ndo luga tsango tjúa ngujngu nano me'e tsajon ndo jnié iko, ijni je'a jnié je'e ndo. <sup>26</sup>Siá jaña xrojuinche'e ndo Cristo xrokonda xrokuen'en ndo itsjé vez ti xrangíxixión kóna nunte xasintajni. Ko jai ó tuinxin tsjexin nunte xasintajni, me'e ndo Cristo konoxin ndo ko kuen'en ndo naakua vez ixi sinchemé'e ndo ti ndako'a juinche'e chujni. <sup>27</sup>Méxin, jaña xrokonda tsen'en chujni ste ngata'a nunte naakua vez, ko tjume'e ngajní tsóñexin na ijie ti nge'e juinche'e ngujngu chujni. <sup>28</sup>Jaña kaxon ndo Cristo naakua vez kuen'en ndo ixi tsooméxin jíee kueya chujni. Ko tjume'e tsii ndo íjngo, ko nchakon me'e ísinchemé'a ndo ti ndako'a juinche'e chujni. Je'e ndo tsii ndo tsajon ndo juachaxin stechón kain chujni stechón'en xrokjan ndo.

**10** <sup>1</sup>Ixi ley kuetuan'an ndo Moisés je'o tjakoxin inaa juachaxin ícha jian tsii, ko ti kuetuan'an ndo me'e, je'o konoxin xranchi naa tsa'on ko jua'i kuantsje ti ndako'a kuachóna chujni. Méxin, ngujngu nano bakonchjiñe'e sen ngajin ndo Dio ixi bakajon sen

jnié iko tsiken'en. <sup>2</sup>Ko siá ley me'e nduaxin xrojuinchemé'e ti ndako'a kuanche'e sen, íxroxraxaon'a sen nge'e ti ña'i juinche'e sen ko íxrokuajon'a sen iko xrokuen'en. <sup>3</sup>Ko ti tóña sen iko ngujngu nano je'o nchexraxaon sen ti ndako'a juinche'e sen, <sup>4</sup>ixi jnié kuxinta ko jnié kubito jua'i juinchemé'e ti ndako'a juinche'e chujni.

**Ti kuen'en ndo Cristo ixi jaína**

<sup>5</sup>Méxin, nchakon ndo Cristo kují ndo ngata'a nunte xasintajni ndache ndo ndo Dio:

Ja'anta tjaun'anta iko tsen'en ko tjaun'anta ninna nge'e tsaye'enta.

Na'i.

Ja'anta juincheñaninta xranchi naa chujni

<sup>6</sup>ixi ja'anta nta'inta juaxruxin jnié iko ko ikaxin nge'e xrokuajon chujnianta, ixi me'e xrokoméexin ti ndako'a juinche'e na.

<sup>7</sup>Méxin, ja'in ndachrjan: "Nti'i ritjén jan'an xranchi nichja xroon jitaxin chijnie ndo Dio

ko jan'an tsitika'on ti tjaun ja'anta, Dio."

<sup>8</sup>Ndachro ndo Dio sa'ó ixi tjaun'a ndo ko nche'a ndo juaxruxin iko tsen'en ko xro'an nge'e ti jii ngata'a nunte xasintajni tsoméxin ti ndako'a juinche'e chujni, maski jaña kuituan'an ley kuajon ndo Moisés. <sup>9</sup>Tjume'e ndachro ndo Cristo: "Nti'i jui'i ixi

sinta'a ti ja'anta tjaunnta, Dio." Me'e xrondachro ndá'a tsakéenta ti xrajon jnié iko tsoméxin ti ndako'a ixi jai kují inaa ijní ícha tjintee. <sup>10</sup>Ndo Dio juinchetjúa ndo asééina ixi ndo Jesucristo kuitikaon ndo xranchi tjaun ndo Dio ko je'e ndo kuen'en ndo ixi jaína naakua naa vez, ko me'e kuitee kain nchakon.

<sup>11</sup>Kain ndotaana judío tonchjiñe'e ndo ngajin ndo Dio ngujngu nchakon ko tóña ndo iko tsoméxin ti ndako'a juinche'e ni tjajnée ndo, ko ijní me'e chónda'i juachaxin tsoméxin ti ndako'a juinche'e na. <sup>12</sup>Ko ndo Jesucristo naakua naa vez kuen'en ndo ixi jaína ko tjume'e bake'e ndo ndatsjonxin jian ti jii ndo Dio.

<sup>13</sup>Ko nti'a jichón'en ndo tsjexinja kain ni ningakon'en ndo tsake'e na ngangi tutée ndo. <sup>14</sup>Méxin, jaña naakua naa vez xrajon ndo, xranchi naa nge'e tjintee kuayé'e ndo Dio, ixi jaña ícha juinchejian ndo chujni tikinixin'en ndo.

<sup>15</sup>Ko Espíritue ndo Dio nduaxin nchenoína jii, me'e tsindachro ndo:

<sup>16</sup>Jan'an sintaña naa juachaxin ngajin chujnina tsatsingaja nchakon jii, ichro Ncháina. Tsakée chijnina ngaya aséen na, ko kaxon xrokjin chijni ngaya jaa na.

<sup>17</sup>Ko kaxon ndachro:

Íxroxraxaon'a jan'an ti ndako'a ko ti ña'i juinche'e na.



<sup>18</sup> Jaña siá ó komé'e ti ndako'a juintu'una, íxrokonda'i xroxrajon ícha injñ tsoméxin ti ndako'a juintu'una.

**Xrokonda xrochuntiana  
ngajin ndo Dio**

<sup>19</sup> Kichuuna, jai íxro'an nge'e tingakoína, ó chao tsixin'inna ndo'a ndo Dio, nchia ícha Tjúá, juasiexin jnié ndo Jesucristo, <sup>20</sup>ixi je'e ndo kuantje'e ndo naa cha'o natjúá tsayéxinna juachaxin tsechónna kain nchakon; cha'o me'e tsatsingatu'e velo ko me'e xrondachro ixi je'e ndo kuen'en ndo ixi jaina. <sup>21</sup>Ndo Jesús, Ndotánaína ícha tetuan'an, je'e ndo tetuan'an ndo ndo'a ndo Dio. <sup>22</sup>Méxin, chao tsonchjiñe'ena ngajin ndo Dio ixi jaina chuntiana ndo ixi je'e ndo ó juinchetjúá ndo aséeina, ko xrokjui xranchi inda tjúá junemáxin ndo cuerpoína, ko me'e aséeina ísinchexraxaon'ana ti ndako'a juintu'una. <sup>23</sup>Soji chuntiana ko jian tsitikaonna ixi nduaxin tsayé'ena ti tsajon ndo ixi je'e ndo nduaxin nche'e ndo ti ndachro ndo. <sup>24</sup>Jian tsje'ena xranchi tsingijna kichuuna, xranchi xrotjue'e kichuuna ko je'o ti jian sintu'una. <sup>25</sup>Ko tsintue'ana xroxra'una nchakon xra'oni ti xrotsjeni ngajin ndo Dio xranchi nche'e íkaxin sen. Jaina chaxro xronichje'e kichuuna, ixi ó jitonchjiñe'e nchakon xrokjan Ncháina Jesucristo.

<sup>26</sup>Siá ó kuichuxinna chijni jian ko xrastenche'ena ti ndako'a, ko ó noína ixi xrojuinche'ana me'e, í xro'an nge'e jii tsayé'e ndo Dio ixi sinchemé'e ndo ti ndako'a juintu'una, <sup>27</sup>ko jaña je'o xrochon'enna tsoñá ijie, ko xrochena xranchi xroche chujni ningakon'en ndo Dio. <sup>28</sup>Sa'ó siá xrojan ngisen bakitikaon'a ley kuetuan'an ndo Moisés, ko siá jii yuu o ní sen bikon nge'e kon'en, í jua'i tsikonóeni chujni me'e, xrokonda tsen'en chujni. <sup>29</sup>Xraxaonnta xranchi ícha tangi tson'en ni xronichja kontree Chjen'en ndo Dio, ko ni titikaon'a juachaxin chónnda jnié xjan. Ni xraxaon jaña kaxon nichjangf'e nã Espíritue ndo Dio, ndo tjaunna, ko titikaon'a nã jnié ndo Cristo kuixin juachaxin natjúá, ko injñ me'e juinchetjúáxin ndo Dio aséen sen titikaon chjen'en ndo. <sup>30</sup>Noína ixi tsindachro Ncháina: "Jan'an tixinixinna sintaña ijie, jan'an xrotjá'a nã ti tixinixin'en nã ixi ti ndako'a juinche'e nã." Kaxon tsindachro: "Ncháina sinchéña ndo ijie ngajin ni tjajnee ndo." <sup>31</sup>Tsango tangi tson'enni siá tsitikaon'ani ndo Dio, ndo jichón.

<sup>32</sup>Ko ja'anta xraxaonnta xranchi tangi junta'anta nã nchakon kuaye'enta xro'i tingasáña ne'e ndo Dio, ko soji kuinteenta nchakon me'e. <sup>33</sup>Kaxin ja'anta tsango chinga ntatjunta nã ko kain ni tjajna bikon nã bikaonta ko kaxinnta

jaña junta'anta na kaxon. <sup>34</sup>Ko ja'anta bikonóe'enta kaxon kain sen xraxin'in na ngaxin'in ndo'achjiso, ko tsjangaxin'anta ti kuantsja'anta na kain nge'e tjintee kuachondanta, ixi no'anta ixi ngajni xrochondanta naa nge'e ícha jian ko nai'a tsjexin. <sup>35</sup>Méxin tintue'anta ti chuntianta Ncháina ixi me'e tsayéxinnta naa nge'e ícha tjintee. <sup>36</sup>Nchakon tsikaonnta ko ti tsuyaku'anta na, me'e xrokonda soji tsinteenta ko tsitikaonnta ti tjaun ndo Dio, me'e tsaye'enta ti tsindachro ndo. <sup>37</sup>Ixi jaña ndachro xroon chijnie ndo Dio:

Tuinxin, tsango tuinxin tsii  
ngisen ndachro xroon  
xrokjan,

ko ítsonchrjen'a tsii ndo Jesús.

<sup>38</sup>Sen chuntiana jan'an ko tjúa  
aséen sen,  
me'e sen tsechón kain  
nchakon;

ko siá xrokjan sen sinche'e sen  
ti ndako'a, jan'an tsake'a  
juaxruxin ngajin sen.

<sup>39</sup>Ko jaina je'a xranchi chujni  
ikjan nche'e ti ndako'a ko ni  
me'e itsji na ti jii xro'i chexin ni  
ndako'a nche'e. Jaina tsjachana  
itsjina ngajin ndo Dio ixi jaina  
chuntiana ngajin Ncháina.

### Ti chúntiani

**11** <sup>1</sup>Ti nduaxin chuntiana  
ndo Dio me'e noina ixi  
tsayé'ena nge'e stechon'enna,

ko nduaxin noina ixi jii nge'e  
tsayé'ena, maski tikon'ana.

<sup>2</sup>Ndo Dio jian kuayé'e ndo sen  
tachri'ina ixi je'e sen nduaxin  
chuntia sen ngajin ndo.

<sup>3</sup>\*Ti chuntiana ngajin ndo  
Dio me'e noina ixi je'e ndo  
tsijinchekonchjian ndo nunte  
xasintajni ko ngajni ko ti tikonni  
kónaxin ti tikon'ana.

<sup>4</sup>Ko ti kuachúntia ndo Abel,  
me'e kuajon ndo naa nge'e ícha  
jian kuayé'e ndo Dio, ko ndo  
Caín, na'i. Ko ndo Dio jian nichja  
ndo ixi ndo Abel ixi tsango jian  
kuanche'e ndo, méxin kuayé'e  
ndo nge'e kuajon ndo Abel, ko  
maski ó sée kuen'en ndo Abel,  
ti kuachúntia ndo ndo Dio, me'e  
xrajnichja jai.

<sup>5</sup>Ixi ti kuachúntia ndo Enoc  
ngajin ndo Dio, je'e ndo kuen'a  
ndo ixi ndo Dio sabikao ndo ndo  
Enoc ngajni, ko ndakuitja'i na  
ndo ixi sakjui ndo ngajni. Xroon  
chijnie ndo Dio ndachro ixi ndo  
Enoc nchakon bake'e ndo nti'i  
tsango kuachúntia ndo, méxin,  
ndo Dio bake'e ndo juaxruxin.

<sup>6</sup>Ko ndo Dio take'a ndo juaxruxin  
ngajinna siá jaina chuntia'ina  
ngajin ndo ixi siá tsonchjiñe'ena  
ngajin ndo xrokonda tsitikaonna  
ixi je'e ndo nduaxin jii ndo, ko  
tsajon ndo nge'e tsayé'e sen  
nduaxin rué'e ndo.

<sup>7</sup>Ti chuntia ndo Noé ngajin  
ndo Dio, nchakon ndo Dio  
ndachro ndo nge'e xrokon'en,

ndo Noé maski xratikon'a ndo nge'e me'e, kuitikaon ndo, méxin juinchekonchjian ndo naa nt̄arco ixi jaña xrokuitjáña'i sen ndo'a ndo. Ko ixi ti chuntia<sup>8</sup> ndo Noé ngajin ndo Dio, je'e ndo kuayé'e ndo nge'e jian tajon ndo Dio ngajin ni nduaxin chuntia ndo, ko ndo Noé nichje'e ndo chujni ko je'e n̄ kuitikaon'a n̄, méxin, kuitjáña n̄.

<sup>8</sup>Ko ti kuachúntia ndo Abraham ngajin ndo Dio, nchakon kuiye'e ndo ndo Abraham, je'e ndo kuitikaon ndo, ko kuachrjexin ndo tjajnéé ndo ko sakjui ndo ti nunte xrokuajon ndo Dio, maski noe'a ndo no jii nunte me'e. <sup>9</sup>Ko ti chuntia ndo Abraham ngajin ndo Dio, méxin, bake'e ndo ti nunte kuajon ndo Dio, ko bake'e ndo nti'a xranchi naa ni tsiki'xin ikjín. Ko ndo'a ndo naa nchia tsikónaxin manta, ko kaxon jaña bake'e ndo Isaac ko ndo Jacob, ko je'e sen kaxon kuayé'e sen nge'e tsindachro ndo Dio tsajon ndo ngajin sen. <sup>10</sup>Ko ndo Abraham chón'en ndo naa tjajna tsajon ndo Dio, ko tjajna me'e tsitjáña'i tjajna ixi ndo Dio juinchekonchjian ndo tjajna.

<sup>11</sup>Ko jan Sara, janchri'e ndo Abraham, kuachúntia jan ndo Dio, ko maski jua'i banchejongi'e jan ichjan, ko je'e ndo Abraham ko jan Sara yui sen ó tachríi sen, je'e sen kuayé'e sen juachaxin ixi je'e jan Sara juinchejongí'e jan naa xjan xi, ixi chuntia jan ti

ndachro ndo Dio jaña xrokon'en. <sup>12</sup>Kaxon ndo Abraham, maski ó tsango tachríi ndo ko ó mero tsen'en ndo, xrabikon ndo ixi tsango kueya chujni tsachrjenixin ndo, ko kain sen ndo'a ndo me'e tsango kueya sen xranchi nchanotsé jii ngajní o xranchi nchese jii ngande'e ndachaon, ko jua'i tsekini sen.

<sup>13</sup>Ko kain sen me'e ó kuen'en sen ko íkuayé'a sen ti tsindachro ndo Dio xrokuajon ndo, ko ixi chuntia sen ngajin ndo, maski bikon'a sen ti xrokuajon ndo, je'e sen kuitikaon sen, méxin, ché'e sen ko kuandachro sen ixi nunte xasintajni je'a ndo'a sen ixi nti'i nchion tinteeni xranchi ngisen tì'xin ikjín. <sup>14</sup>Ko sen jaña nichja ixi nduaxin je'a nía sen nti'i ngata'a nunte xasintajni, méxin ndachroxin xrastetjée sen ti no jii tjajnéé sen. <sup>15</sup>Ko siá tjaun sen xrokjan sen tjajna tsikachrjenixin sen, chao xrokjan sen nti'a íjngo. <sup>16</sup>Ko na'i. Je'e sen tjaun sen naa tjajna ícha jian, tjajna me'e jii ngajní. Ko ndo Dio tosue'a ndo ixi xrojuinchekin'in sen ndo, ndo Dio ne'e sen, ko je'e ndo ó juinchekonchjian ndo naa tjajna tsayé'e sen.

<sup>17</sup>Ndo Abraham nduaxin chuntia ndo ngajin ndo Dio ko kuayé'e ndo nge'e kuajon ndo Dio, ko ndo Dio tjaun ndo xrokono'e ndo á nduaxin chuntia ndo Abraham ngajin ndo, méxin, ndo Abraham kuajon ndo

<sup>8</sup>11:7 *chuntia* tener fe

chjen'en ndo, xjan Isaac, xranchi naa nge'e tsayé'e ndo Dio, maski chjen'en ndo, xjan naakuaxixion kuachónda ndo, ko maski tsindachro ndo Dio: <sup>18</sup>“Xjan Isaac tsachrjenixian itsjé chujni.” <sup>19</sup>Ko ndo Abraham no'e ndo ixi ndo Dio nduaxin chónda ndo ijíe juachxin sinchexechón ndo chujni tsiken'en. Ixi kuachúntia ndo Abraham, méxin ndakuen'a chjen'en ndo ko xranchi fingo xrokuayé'e ndo xjan Isaac, ko jaña kon'en xranchi xroxechón xjan Isaac.

<sup>20</sup>Ko ixi chuntia ndo Isaac ngajin ndo Dio, me'e juinchenchaon ndo kayui chjen'en ndo, xjan Jacob ko xjan Esaú, ixi xrokuayé'e xjan naa nge'e jian tsij kaxin nano tjume'e.

<sup>21</sup>Ko ndo Jacob chuntia ndo ngajin ndo Dio, méxin, nchakon ó xrokuen'en ndo, xrachao juinchenchaon ndo ngujngu chjen'en ndo José, ko kuajon ndo juasaya ngajin ndo Dio, nchakon me'e ntakuto'e ndo jitosojixin ndo.

<sup>22</sup>Ko ixi chuntia ndo José ngajin ndo Dio, nchakon ó xrokuen'en ndo, ndachro ndo ixi tsij naa nchakon sen israelita tsachrjexin sen tjajna Egipto, ko kuetuan'an ndo ixi nchakon satsjixin sen tjajna me'e satsikao sen kain nte'e ndo.

<sup>23</sup>Ndotée ndo Moisés ko janée ndo nduaxin chuntia sen ngajin ndo Dio, méxin, nchakon jongí'e ndo Moisés, je'e sen kuemá sen ndo níi nchanitjao ixi bikon sen ixi je'e ndo naa ichjan tsango

chaxro jitsje'e xjan ko xrakuen'a sen nge'e tsiketuan'an xi rey ixi je'e xa tjaun xa xrokuen'en kain xjan xi, xjan israelita. <sup>24</sup>Ixi ti chuntia ndo Moisés ngajin ndo Dio, me'e nchakon ó bangi ndo, chro'a ndo xronache na ndo ixi je'e ndo chjen'en nchrichje'en xi rey ne'e tjajna Egipto. <sup>25</sup>Je'e ndo xraxaon ndo ixi maski chjinga xrojuinckekao na ndo xranchi nckekao na sen tjajnee ndo, ícha jian me'e ixi xroché'e ndo xrojuinckhe'e ndo ti ndako'a nckhe'e ni tjajna Egipto. <sup>26</sup>Ko xraxaon ndo ixi ícha tjintee tangi xrokuatsinga ndo xranchi tangi xrokuatsinga ndo Cristo ícha tjume'e ixi xrochónda ndo kain nge'e tjintee jii tjajna Egipto, ixi je'e ndo jichúntia ndo tsayé'e ndo ti tjintee xrokuajon ndo Dio. <sup>27</sup>Ko ixi ti chuntia ndo Moisés, me'e sajuixin ndo tjajna Egipto, ko xronka'i ndo xrokoñaio xi rey ngajin ndo. Je'e ndo cháña chuntia ndo ndo Dio, ko jaña juinckhe'e ndo xranchi xrobikon ndo ndo Dio, ndo jua'i tikonna.

<sup>28</sup>Ko ixi ti chuntia ndo Moisés, me'e kuaxi juinckheña ndo kia pascua, ko kuetuan'an ndo ixi xrobingaxin ntachja ixi ijni, ixi jaña ndo ángel tóna chujni, jua'i naaxrokónaxón ninaa xjan sa'ó, chjen'en sen israelita. <sup>29</sup>Ko ixi ti chuntia sen israelita ngajin ndo Dio, me'e chao kuatsingatu'e sen Ndachaon<sup>h</sup> Játse, xranchi

<sup>h</sup> 11:29 *Ndachaon* mar

xrokjui sen ngata'a inche xema, ko kaxon ni t'ajna Egipto t'jaun na xrokuatsinga na, ko je'e na k'jun'en na inda ko kuen'en na.

<sup>30</sup> Ko ixi chuntia sen israelita ngajin ndo Dio me'e jamangi naa t'jatu'o ijié jingakuenxin t'ajna Jericó, ti je'e sen kuaji sen ngandajin t'jatu'o yaato nchakon.

<sup>31</sup> Ixi nchri Rahab, nchri bikitéexin itsjé xi, je'e nchra kuen'a nchra xranchi kon'en ni kuitikaon'a ndo Dio, ixi je'e nchra juakoxin nchra ixi chuntia nchra ndo Dio nchakon jian kuayé'e nchra sen t'ajna Israel, sen tsikii kuitsjája t'ajnéé nchra Jericó.

<sup>32</sup> ¿Ko nge'e ícha xrontat'junta? Tsitja'i nchakon ixi tseki'anta ixi ndo Gedeón, ndo Barac, ndo Sansón, ndo Jefté, ndo David, ndo Samuel, ko sen kuanichjaxin chijnie ndo Dio ó sa'ó. <sup>33</sup> Je'e sen chuntia sen ngajin ndo Dio, me'e juacha sen kuetuen'en sen ikaxin t'ajna ijié, ko jian juinchéña sen ijié ngajin chujni me'e, ko kuayé'e sen nge'e tsindachro ndo Dio xrokuajon ndo, ko kuije'e sen ro'a kujenda,<sup>i</sup> <sup>34</sup> ko juincheckanga sen xro'i xrochexin sen, ko juacha sabinga sen ixi t'jaun na naaxrokónaxón na sen ixi chika espada. Ko sen konchrje, chao juinchesoji aséen sen, ko juacha sen juaya sen ixi tsango konsoji sen, ko juacha sen ngajin kain ni kuaningakon'en sen. <sup>35</sup> Ko bake'e

kaxin nchri chúntia nchra ndo Dio me'e íjngo kuayé'e nchra sen ndo'a nchra, sen tsiken'en ixi sen me'e xechón sen.

Ko ikaxin sen cháña kuen'en sen ixi je'e sen t'jaun'a sen xrokuintu'e sen ti chuntia sen ndo Dio ixi kono'e sen ixi xroxechón sen inaa nchakon ko nti'a ícha jian tsake'e sen.

<sup>36</sup> Ikaxin sen kuaxi na sen ntaa, ikaxin sen juanoa na sen, ko ikaxin sen kuinchruxin na sen nochika ngaxin'in ndo'achjiso.

<sup>37</sup> Ikaxin sen ixro kónaxin na sen, ko ikaxin sen konchrinjindunga na sen ixi chika sierra, ko ikaxin sen kónaxin na sen chika espada ko ikaxin sen chrikao na sen nti'i, nda'a, ko baketsaa sen ixi t'jue'é kutuchjon ko t'jue'é kubito ixi tsango nóa sen, juaxruxin'a bake'e sen ixi tsango chinga juincheckao na sen. <sup>38</sup> Ko ni nunte xasintajni tikinixien'a na xrobikon na sen. Je'e sen kuachóna'i sen t'ajna, ntajie nti'a bakintee sen ko ijna nti'a bakaji sen, ko ngaxin'in it'jaoj ko ngaya yaso'e kóna ndo'a sen. <sup>39</sup> Ko ninaa sen kuayé'a sen ti tsindachro ndo Dio xrokuayé'e sen ko je'e ndo juinche'e ndo juaxruxin ixi nduaxin kuitikaon sen ndo, <sup>40</sup> ixi ndo Dio ó tsixraxaon ndo tsajon ndo naa nge'e ícha jian ngajin jaina ti xrustechónna ko kain sen chuntia ndo ó seno,

<sup>i</sup> 11:33 *Kujenda* león <sup>j</sup> 11:38 *It'jao* cueva

sen chinga juinchekaon na, ixi jaña ngujnguna tsayé'ena naa juachaxin natjúá ko jaña tsontjúá aséina.

### Je'lo ndo Cristo tsitikaonna

**12** <sup>1</sup> Ko jaina noina ixi chondana ngandajinna kueya sen tjakoxin ixi nduaxin kuachúntia sen ndo Dio, sen kuintee seno, méxin ndá'a tsintu'ena kain nge'e ti ndako'a tingakoina ko jaña chao tsingana, xrorué'ena ti nge'e chuntiana. <sup>2</sup> Me'e jian tsitikaonna Ncháina Jesús ixi je'e ndo tingijnana ndo xrochuntiana ngajin ndo ícha jian, ko je'e ndo tjakoina ndo ixi kosue'a ndo nchakon kuenito na ndo ntacru ko kuen'en ndo ixi je'e ndo no'e ndo, maski chinga xrojuinchekao na ndo, je'e ndo juaxruxin xrobake'e ndo ngajin ndo Dio, ko jai ndatsjonxin jian jii ndo ti tetuan'an ndo Dio.

<sup>3</sup> Méxin, xraxaonnta ti juakoina Ncháina Jesús, itsjé chujni chinga juinchekaon na ndo, ni ndako'a nche'e, ko juacha ndo kuatsinga ndo kain ti tangi juinchekao na ndo; méxin, ja'anta tonchrje'anta ko tintue'anta ti chuntianta ndo Dio. <sup>4</sup> Ixi jai ja'anta xraritetok'u'unta kain ti ndako'a ko xratiiji'a nchakon tsen'ennta xranchi kuen'en Ncháina. <sup>5</sup> Ja'anta á ó tjáña'anta chijni tjáanta ndo

Dio ixi je'e ndo nichja'anta ndo xranchi chjen'en ndo ixi ja'in ndachro xroon chijnie ndo Dio:

Chjan'na, ja'anta toña'anta xranchi nichja'anta Ncháina nge'e sinche'enta, ko tsonié'a asáanta nchakon tuyakutéenta Ncháina.

<sup>6</sup> Ixi Ncháina tuyakutéé ndo kain sen tjue'e ndo ko tajon ndo juachaxin tangi tatsinga sen tayé'e ndo xranchi chjen'en ndo.

<sup>7</sup> Tokuaxin'anta nge'e soji nichja'anta ndo Dio ixi je'e ndo nichja'anta ndo xranchi chjen'en ndo. ¿Á xrojan ndotée naa ichjan xrokuyakuté'a ndo xjan nchakon ndakua'i jinche'e xjan? <sup>8</sup> Siá ndo Dio tsuyakute'anta ndo xranchi chjen'en ndo, me'e xrondachro ixi je'a nduaxin chjen'en ndo ja'anta, je'a xjan tsikachrjenixin ndo. <sup>9</sup> Jaina ti xranchinchina, Ndotáina bakuyakutéena sen ixi bakitikaon'ana sen, ixi ndako xrojuintu'una nge'e ko jaña batitikaona sen. Méxin, ¿xranchi xrokuitikaon'ana Ndotáina jii ngajni?,<sup>k</sup> ndo chjaina juachaxin tsechónna kain nchakon. <sup>10</sup> Sen ndotáina bakuyakutéena sen ixi tjaun sen ndako tsitikaonna nge'e jian baketuaina sen ti xrastena kaxion nchakon nti'i ngata'a nunte xasintajni. Ko ícha Ndo Dio, je'e ndo nduaxin nchekuaína ndo nge'e jian tikinixin sinche'ena ko me'e

<sup>k</sup> 12:9 ngajni cielo

tsjachana tsontjúá aséeina xranchi je'e ndo tjúá ndo. <sup>11</sup>Ko nduaxin ninaa jaína tjaun'ana tsikaonna kondeexin ti ndakua'i tsijintu'una ko take'ana xraxaonna ixi ti tsikaonna me'e tsingijnana ixi juaxruxin tsinteena ko jaña sinche'ena ti jian.

**Tsango tangi ton'en chujni titikaon'ani ti nichja ndo Dio**

<sup>12</sup>Méxin, ícha nchesoji tjáanta tsikonchrje ko nchesoji ntatuchi'innta ísoji'a, <sup>13</sup>ko tjéenta cha'o jian ko nao itji. Me'e tsoxruen'en tutéanta ni'e ko ítsitaon'a tutáanta.

<sup>14</sup>Chaxro ko juaxruxin tinteenta ko jian tjentonta kain chujni, ko nchetjúá asáanta ixi síá sinchetjúá'i asáanta jua'i tsikonnta Ncháina Jesucristo.

<sup>15</sup>Jian tsje'enta ixi kain sen tsayé'e sen ti nchekitun'enni ndo Dio, ixi síá na'i, tson'en xranchi naa ika itsjá, ko síá xrojan sen xroku'i ti itsjá me'e, tsontsjá aséen sen ko sincheni'e sen ikaxin chujni.

<sup>16</sup>Ninaa ja'anta tsarichriko'inta inaa chujni je'a xixi'anta o je'a nchrinchri'anta, ko tintue'anta ti jian tjáanta ndo Dio ixi jaña juinche'e ndo Esaú, juinchejji ndo juachaxin tikinixin'en ndo ixi je'e ndo xjan sa'ó ndo, ko juasingíxin ndo juachaxin me'e ixi naa laato ndaxrée jma. <sup>17</sup>Ko

ja'anta ó no'anta ixi nchakon ndo Esaú tjaun ndo xrokuayé'e ndo juachaxien ndotée ndo, jua'i kuayé'e ndo juachaxin me'e, maski tsango tsjanga ndo, í jua'i kuindexin ndo ti juinche'e ndo.

<sup>18</sup>Ja'anta konchjiñe'anta ti ijna bake'e ndo Dio xranchi konchjiñe'e sen israelita, ijna jitjama xro'i ko chao xrotséni ijna me'e, ko konchjiñe'anta ti naxixe'e ko ti no jii ichrin ko chrinto soji. <sup>19</sup>Ko ja'anta kaxon kuien'anta ndachro itjao,<sup>1</sup> ko kuien'anta nichja ndo Dio, jaña sen israelita, sen kuin'en nichja ndo Dio, kuinóatée sen ixi íxronichja'i ndo, <sup>20</sup>ixi tjaun'a sen tsin'en sen ti ndachro ndo Dio: “Xrokonda tsen'en ngisen tsake'e tutée ngata'a ijna. Ji'i xrondachro naatsenxón iko o chujni ixi ntayao o ixro.”

<sup>21</sup>Tsango ijie juaxrakon me'e, méxin, ndo Moisés ndachro ndo: “Jan'an tsango xronkana, méxin rixranga.”

<sup>22</sup>Ko je'a xranchi konchjiñe'e sen israelita, ja'anta nduaxin konchjiñe'anta ngajin ijna Sión, tjajnéé ndo Dio, ndo jichón kain nchakon, tjajna me'e tjajna Jerusalén jii ngajni, ko nti'a ste itsjé sen ángel, stetajon sen juasaya ngajin ndo Dio, <sup>23</sup>ko kaxon nti'a ste kain chjen'en ndo Dio, xjan jitaxin xroon jii ngajni. Ja'anta tsikonchjiñe'anta ngajin ndo Dio, ndo nchéña ijie ngajin kain chujni,

<sup>1</sup>12:19 *itjao* trompeta

ko konchjiñe'enta ngajin espíritu sen jian juinche'e, sen ó tjúá aséen, <sup>24</sup>ko tsikonchjiñe'enta ngajin ndo Jesús, ndo nichjaxinna ixi inaa juachaxin natjúá ko jnié ndo, ijni kuintjí kuijmaxinna. Ko ijni me'e ícha jian nichjaxin ijni, je'a xranchi jnié ndo Abel.

<sup>25</sup>Méxin, jian tsje'enta ngisen jinichja'anta ko titikaonnta ndo Dio, ixi sen tjajné ndo, sen kuitikaon'a nchakon kuyakutee ndo sen ngata'a ijna jua'i sabinge'e sen ndo. Méxin, jaina ícha jua'i satsinge'ena ndo síá sintu'una ti ndako'a ko tsitikaon'ana ndo, ixi je'e ndo jinichjaina ndo ko téé ndo jiti'xin ngajni. <sup>26</sup>Nchakon me'e, nchakon nichja ndo Dio, kontengí nunte. Ko jai ndachro ndo: “Chao íjngo tsontengi nunte ko je'a je'o nunte, kao ngajni tsontengi.” <sup>27</sup>Ko ti ndachro ndo “íjngo”, tienxinni ixi tsitjáña kain nge'e ti tsikonchjian, kain nge'e ti tontengi, ko je'o tsitu'e kain nge'e ti tontengi'a. <sup>28</sup>Juasie ndo Dio ixi juachaxin chjaina ndo, jua'i tsontengi juachaxin me'e. Ko tsakexinna ntatuchi'inna ko xrokonda tsajonna juasaya ngajin ndo ko xrotjue'ena ndo ngaya aséeina xranchi je'e ndo nche'e ndo juaxruxin, <sup>29</sup>ixi ndo Dio na'ina, xranchi naa xro'i ndo, xro'i tjaaka kain nge'e ko xro'an nge'e titu'e.

**Ti jian sinche'ena me'e  
sinche'e ndo Dio juaxruxin**

**13** <sup>1</sup>Ngujngu ja'anta tintue'anta ti tjue'enta kichuunta xranchi xrokonda

sinche'e ngujngu chujni titikaon ndo Jesús. <sup>2</sup>Chaxro nichje'enta sen tsiji ndointa ko tsitu'e sen nti'a ixi jaña tsijinche'e kaxin sen, noe'a sen ixi kaxin sen ángel tsichjée sen juachaxin tsikitu'e ndo'a sen.

<sup>3</sup>Xraxaonnta ixi sen steje'e ndo'achjiso, xranchi ja'anta steku'unta sen nti'a. Xraxaonnta ixi kain sen chinga nchekao na, xranchi ja'anta jaña xrojuinta'anta na kaxon.

<sup>4</sup>Xraxaonnta ixi ti kuta'anta tsango jian ko tsango tjintee me'e, méxin ncheye'anta ndoxi'anta o janchri'anta, ixi ndo Dio sinchéña ndo ijie ngajin ni ndako'a nche'e, xranchi ni tejuakao ni je'a ndoxi'e o janchri'e.

<sup>5</sup>Tjue'anta tomi, take'énta juaxruxin ixi je'o ti richondanta; ixi tsindachro ndo Dio: “Jan'an tsintua'inta ko xrotjáñana'i ixi ja'anta.” <sup>6</sup>Méxin, chao xrondachrona:

Nhána, je'e ndo tingijnana ndo,  
méxin, xro'an nge'e  
xraon'ana ixi chujni jua'i  
sinchenánana.

<sup>7</sup>Xraxaonnta ngisen juako'anta ko nichja'anta sen chijnie ndo Dio; take'énta xraxaonnta xranchi jian juinche'e sen ngata'a nunte nti'i ko nche'enta xranchi juakoxin sen, xranchi je'e sen tsango chuntia sen ndo Dio.

<sup>8</sup>Ndo Jesucristo, je'e ndo xraje'o ndo najna, jai ko kainxin



nchakon. <sup>9</sup>Tintue'anta ixi sintakuan'annta na ikaxin chijni, chijni je'a chijnie ndo Dio ixi je'e na tjakona kaxon ley kondee ti sineni ko me'e xro'an tunda. Chaña nchesoji aséeina ixi ndo Dio tjaunna ndo.

<sup>10</sup>Jaina kuaye'ena inaa altar kueta'a nge'e xrajon ngajin ndo Dio ti tsoméxin nge'e ndako'a juinche'e chujni, ko me'e jua'i kuayé'e sen taana kuanche'e ixra ó sée ngaxin'in nchia tsango tjúa. <sup>11</sup>Ko ndotaana ícha tetuan'an ndo bakikao ndo jnié iku ngaxin'in Nchia ícha Tjúá ixi ijni me'e xrajon ixi jaña tsomé'e ti ndako'a kuanche'e chujni. Ko ntau'e iku me'e kuache ngande'e tjajnéé na. <sup>12</sup>Jaña kaxon Ncháina Jesús bikaon ndo kuenxin ndo ngande'e tjajna Jerusalén, ko jnié ndo me'e kuijmaxin ti ndako'a kuanche'e chujni. <sup>13</sup>Tsachrjena ko rué'ena Ncháina Jesús ngande'e tjajna, ko xranchi kain ti chinga juinchekao na ndo, jaña tsituexinna sincheina na kaxon. <sup>14</sup>Ixi ngata'a nunte xasintajni nti'i chonda'ina ninaa tjajna tsake'e kainxin nchakon; méxin, stetjéena inaa tjajna, naa tjajna nandá tsii. <sup>15</sup>Ixi juasie Ncháina Jesucristo me'e chao tsajonna juasaya ngajin ndo Dio kainxin nchakon. Ixi juasaya<sup>m</sup> me'e naa nge'e tayé'e ndo Dio, xrokonda tsajonna juasaya ngajin ndo ixi je'e ndo tsango jian

ndo. <sup>16</sup>Tjáña'inta ixi xrokonda sinche'enta ti jian ko tingijnanta chujni chónda'i nge'e. Jaña nche'enta ixi me'e nche'e ndo Dio juaxruxin.

<sup>17</sup>Titikaonnta sen tituan'an ngaxin'in ni'ngo, ixi je'e sen tayakon'en sen asáanta ko nojna ixi je'e sen xrochronga sen ngajin ndo Dio ti ixra juinche'e sen ngajinnta. Kaxon ncheña'anta sen ixi jaña ícha juaxruxin sinche'e sen ixra ti kuetuan'an ndo Dio; jaña ja'anta kaxon juaxruxin tsake'enta.

<sup>18</sup>Nichje'enta ndo Dio ixi jan'anna, jian stenta'ana ixra kuituannana ko xro'an nge'e stencheni'e aséenana ixi tja'onna sinta'ana jian kain nge'e.

<sup>19</sup>Ko jan'an tjancha'anta ixi xronichje'enta ndo Dio ixi tsajon ndo juachaxin tuinxin xrokjanna ngajinnta.

#### **Ndo Dio sintanchaonnta ndo**

<sup>20</sup>Ndo Dio, ndo tajon juaxruxin, ndo ncheketo'a chujni, ndo juinchechón Ncháina Jesucristo, ko je'e ndo Jesucristo, ndo tingatjana xranchi kutuchjon, ko ixi jnié ndo me'e kuitee juachaxin natjúá tsake'e kain nchakon, <sup>21</sup>je'e ndo sinchetjúá ndo asáanta, me'e jian sinche'enta kain nge'e ko tsitikaonnta ti tjaun je'e ndo; ko je'e ndo sinche'e ndo ngajin jaina ti je'e ndo tjaun ndo ixi

<sup>m</sup> 13:15 *juasaya* respeto, honor

juachaxien ndo Jesucristo. Ko kain nchakon ndo Jesucristo tsayé'e ndo juasaya. Jaña tson'en.

<sup>22</sup> Kichuuna, tinóatáana ixi tsaye'enta kaxion chijni kjin'annta, ko chijni me'e tsingijnanta ixi ícha tsitikaonnta.

<sup>23</sup> Ntano'anta ixi ndo kichuuna Timoteo ó kuachrjexin ndo

ndo'achjiso. Siá tuinxin tsií ndo tsjasokian ndo nchakon tsjasotsja'anta.

<sup>24</sup> Tájonnta juajnana ngajin kain sen titaon'anta nti'a ko kain sen tjajna chuntia ndo Jesucristo ko taye'énta juajna xruan'annta sen tjajna Italia.

<sup>25</sup> Ko Ndo Dio sintanchaonnta ndo. Jaña tson'en.